





वाच्यु

(জাউআ-করম গিত)

~ চিমর্ঘাইআ ~ অকতিপদেঅ মাহাতত্র (বঁমরিআর)

> ~ নিখ্যবান ~ পঃ সঃ সুল্ডুআলি গুস্গাভেতি

ধানফুল

DHANFUL

(A Book on Jawa-Karam Git)

By

Shaktipada Mahato (Bansriar)

Edition I (2023)

Published by'West Bengal Kudmali Academy' Publication

Vill.- Hetjari, P.O.- Uperjari, P.S.- Arsha, Dist.- Purulia, PIN 723201

- ISBN: 978-81-963081-0-0
 - Copyright © authors
 - Printed by Sarada Press

Vill.- Hetjari, P.O.- Uperjari, P.S.- Arsha, Dist.- Purulia, PIN 723201

Cover & Layout Designed By Manohar Mahato

• Price: Rs- 80.00 (Eighty only)

~ ঔছুগুন ~

বাপেক সেঁউরনে



সুকদেব মাহাতঅ (বঁসরিআর)

জনম : ইঁগ-১২/৪/১৯৫৩

মরনঃ ইঁগ-১৬/৫/২০২২,চীদঅবার

~ মনেক কথা ~

এক আখঅড়েক জ সাড়াটি কতেক জে পুরখেইন হেকেইক, ইটা অকর গাতেক গড়হনেই বুঝাইক। এহে অড় জ সাড়াটি লেই বনলাহেইক জিবন, জাউআ, জউআ, জুআন, জইবুন, জিনগানি নিঅর আরঅ ঢেইরে সাড়া। কুড়মালি চারিক একটা মুল পরব হেলেইক করম পরব আর করম পরব মানেই জাউআ সাড়াটা চলি আউএইক। এহে করম পরবে গিতে, নাচে-ডেগে গহঅগহাই গটা কুড়মালি মুলুক। ভাদঅরেক আদর মাখি গিত গাহা, নাচা, করমতি আর পরবতিরাক হুবেঁ ডুবল মনে খেলি বুলেই রেগেক লহর। করম পরবেক সিরজন কবে হেলাহেইক, ইকথাটা বাচিক করি কেহু কহেলাই পারত নিহি, তবে এহে পরবেক হাজার হাজার গিত মুঁহেঁ মুঁহেঁ এরিআক পেরিআ বাঁচি আহেইক। জে গিতগিলাকে হামরা পুরখেইন/পুরখইত/পুরখেনি গিত কইহউক। খনেক সঁগেঁ তাল মিলাই গিত সিরজন হেতে আহেইক।

হালেক কবিরাউ জাউআ, করমগিত সিরজঅহত। পুরখেইন গিতেক সঁগেঁ হালেক সিরজল গিতগিলাউ চলেহেইক তাল মিলাই।

হালেক কবি সকতিপদঅ মাহাতঅ (বঁসরিআর) আপন সিরজল জাউআ, করমগিতগিলা এক সঁগেঁ গাঁথ ধানফুল নাম দেই পাঁথি করি সমাজেক হাঁথেঁ দেউএক কসঅনিটাকে মঁই অরাকে সাবাইস দেইহন। পাঁথিটাক সভে গিতে আহেইক কুড়মালি সমাজ জিবনেক সুনদর, সুঘড় কথা।কবি সকতিপদক লেখঅনি ধঁচঅর দসর কবি লে ভিনু ঢঁগেক সআদ দেইন। এহে ধানফুল পাঁথিটা নিছু কুড়মালি সমাজ নহেইক, সাহিতপেমি সভেকাকর ঠিনে মাইন পাউতেইক, ইটাঁই মর পুরা পততুক আহি। বড়ি রিকেক বানার, কুড়মালি ভাখিক দমগর কবি সকতিপদঅ মাহাতঅ (বঁসরিআর) জাউআ, করম, করম- ভাদরিআ গিত লেখি পথি ছাপাইকুন কুড়মালি সাহিত ভাঁড়ারকে ফুলেঁ ফরেঁ ব্যবরাউএক কসনি করলা। হামরা আসা রাখব কবিক লেখঅনি চলতে রহউক- আর বাড়তে রহউক কুড়মালি সাহিতেক ভাঁড়ার। জহার।

কিরিটি মাহাতঅ সঁজুএতা মুলকি কুড়মালি ভাখি বাইসি

~ द्विय द्विय ~

কুড়মালি চারিক একটা মুল পরব হেলেইক করম পরব। আর করম পরব মানেই হেলেইক গিতেক সঁগেঁ সঁগেঁ নাচ, ডাঁইড় ধরি পাঁতাসারি নাচ। এহে রিত চলি আউএহেইক পিড়হিক পিড়হি এরিআক পেরিআ। করম পরবেক রিঝেক হাউআঁই গাঁউ ঘারেক বহু, বেটি, মাঁই, জেঠি, কাকি, দিদি, বহিন আদি করি সভেকাই জখন গিত গাহি গাহি নাচত তখন মনটা হরঅখেঁ ভরি জাই। ই কথাটা কাকরঅ অজান নেইখন জে, জাউআ, করমগিত সিরজঅনেক আগদহলি হেকত কুড়মালি সমাজেক মেহেরারু, বেটিছউআরা। অরাক ঠিনেই গিতেক রেগ, ঢঁগ, ধঁচঅর দেখিসুনি মন রিঝাই উঠে লাগলি। আর অহে রেগে, ডেগে ভিজল মনে পাউলঁ জাউআ, করমগিত লেখেক অড়। আস জাগলি লেখল গিতগিলাক একটা পঁথি ছাপাই হেতেইক। মেনেক আইজ কাইল করি করি কইটা বছর বিতি গেলেইক। এখন তড়িক জতেক জাউআ, করমগিত লেখলাহঁ সভেগিলা সমটিকুন এহে পঁথিটা **ধানফুল** নাম দেই নিখরান করহঁ৷ জাউআ করম গিতেক এহে পঁথিটাঁই দমে নিঅর রেগেক গিত আহেইক, আর একুকটা রেগেক কনঅর্টাই তিনটা, কনঅর্টাই চাইরটা, পাঁচটা গিত দেল আহেইক। জাউআ, করম গিতেক সঁগেঁ আহেইক করম-ভাদরিআ রেগেক গিত।কইটা গিতেঁ হিচছা করিএ ভনিতা নিহি দেলাহেঁই। পঁথিটা ছাপি নিখরান করেইতে ঢেইর- ঢেইর লকেক ঠিনলে সাউতা পাউলাহঁ অখরাক রিন জিনগানিভর হিআঁই গঁথল রহতি। আর সেহঅ খাতির অখরাকে মঁই হিআখালাসেঁ জহার করেইহন। একটা ঘার করে গেলে জেসন হরেক নিঅর গুনেক লকেক দরকার রাখেইক, ঠিক তেসনে একটা পঁথি ছাপেইতে হরেক নিঅর গুনেক লকেক দরকার রাখেইক। সভেকাকর নাম কহা দাই হেলউ মর এহে ধানফুল জাউআ করমগিতেক পঁথিটা ছাপেইতে সভেখনে পাসেঁ পাউলাহেঁই, ডেগে ডেগে সাউতা দেলাহাত আর অহে সঁগেঁ পঁথিটাক আখড় বিছঅনেক কামটাউ করলাহাত সেহঅ সমভুদা (সমভুনাথ মাহাতঅ 'বঁসরিআর', হেঁটজাড়ি), অখরাক রিন কবউ সধেলাই পারম নিহি। কুড়মালি ভাখি চারি পছড়ইআ অহে সঁগেঁ নামজাইজকা ঝুমইরা হামর কিরিটিদাঁই (কিরিটি মাহাতঅ, রামকিরসনঅপুর) অখরা ধানফুল পঁথিটাই মনেক কথা লেখিকুন পঁথিটাক মান বাড়হাই মকে অখরাকঠিন চিরঅরিনি করি রাখলা।

পৃথিটা ছাপেক আপাভার লেই চিরঅরিনি করলা সারনা পেরেস, পুরুইলা। মর গিতগিলাকে সাজাই গুছিআই, সুঘড় করি পৃথিক রূপ দেউএক খাতির সারনা পেরেসেক সভে কামিআরাকে মর হিআখালাসেঁ জহার রহলি। পৃথিটাক মলাট সাজানে আপাভার লেঅল মনোহর মাহাতক রিন মর হিআই গৃঁথল রহলি।

সউব লে মুড়ানে একটা কথা নি কহলেই নিহি জে, এহে ধানফুল পঁথিটা সাহিতপেমি, গাহুক, গাহুঅনি, পড়হুআ আদি করি সভেকাকর ঠিন আদ্অরেঁ মাইন পাউলে মর খাটালি পসাতি এহে আস রাখুঅহঁ। জহার।

কবি সকতিপদঅ মাহাতঅ (বঁসরিআর) আদিগুরু বুড়হাবাপ, জহার মাহামাঁই
গড়লাগঁ হে ঠাকুর, করমঅ গুঁসাই॥
জাহিরথানে জাহিরবুড়হি, গাঁউ গরামমাঁই
সসটিমাঁই গড় করঁ, মুঁড় গউ নআঁই॥
গাছপালহা পাহাড় নদি, জতেক বসমতাঁই
সভেকে করিঅন গড়, ভকঅতি হিআঁই॥
মাঁই মসি গুরুজন, জতেক আখঅড়াঁই
সকতিকে না নাগা করা, গড়েকর ধুরাঁই॥

জাউআ উঠাউএলাই জাইএক খনে গিত

সভে সঁগঅতিআ করঅমঅ পরবতিআ জাউআ উঠাউএ চালা জাব, চালা জাব লউ॥ বাঁসেকেরি ডালিআ ভরি নদিক বালিআ সেহঅ ডালিঁই জাউআ রে উঠাব, উঠাব লউ॥ সেঁউরি করমঅ রাই সাজঅবঅ জাউআকর মাঁই সেহঅ জাউআঁই আখঅড়া সাজাব, সাজাব লউ॥ করঅমে সকঅতি ধরি ধরঅমে করঅমঅ করি

धानकुल ~ 7

জিনগানিক দিঅরা জরাব,

জরাব লউ॥

জাউআ উঠা গিত

নাউআ নাউআ ডালি
ভরাই নদিক বালি
উঠাউঅব জাউআ, হুবে নাচি খেলি॥
দনাই দনাই ভততি
মুগ কলাই কুতথি
বুট জনহাইর রমহা, দানা আরঅ জাতি॥
হরইদ বাঁটল গরি
মাখাই জতঅন করি
জাউআ হামর ছউআ,লেবেঁই করাঁই ধরি॥
করঅমেকর সঁগেঁ
গাবি রিঝে রঁগেঁ
কহতঅ সকতিঁই, বাঁচব আপন ঢঁগোঁ॥

নাউআ ডালিঁই বালি ভরি
দিলা মাজি সুথর করি
ইঅ গউ, সেহঅ রে ডালিঁই,
সেহঅ ডালিঁই জাউআ রে উঠাঁউ॥
কুরঅথি মুগ কলাই বিহন
বুট জনহাইর রমহা রে মন
ইঅ গউ, হরইদ রে মাখাই,
হরইদ মাখাই বুনঁ একঅ ধেআন॥

বাগাল জাউআ, বন জাউআ
সাঁচি জাউআ মাচি জাউআ
ইঅ গউ, গরাম রে জাউআ,
গরাম জাউআ অকঅরে সেঁউরন॥
সনাক রঁগেঁ জাউআ মর
হেতি রে বড়ি সুনদর
ইঅ গউ, মাঁইঅ রে রুপেঁ,
মাঁইঅ রুপেঁ করঅবঅ পালঅন॥

দিআ জরা গিত

লেহু লেহু করমরাজা লেহু দিআ বাতি,
আইজ, তর সঁগেঁ রিকোঁ রঁগেঁ জাগব গটে রাতি।।
নাচব খেলব গিত গাহব তর গুনে মাতি,
পাঁতাধরি ডাইড় বেড়হি করমঅ পরবতি।।
ভাদরমাসেক গারঅ চাঁদেঁ আনঅলঁ নেউঅতি,
আখঅড়া মাঝোঁ ডাইর তরেঁ করঅলে বসঅতি।।
আরদাস রহঅলি হামর রহঅলি বিনঅতি,
সকতিঁই কহেই তর গড়েঁ দেবে দিলামতি।।

তাঁগ ধিতাঁগ তাঁগ ধিতাঁগ মাদঅরি বাজইএ, সুনা আখঅড়াঁই, চালা ননদ জাব নাচেলাই। করম আখঅড়াঁই॥ ভাদঅরে আদঅরে মন উঠঅলি রিঝাই, ধরি রাখা দাই, পঁখি লেখে দেলা জে উড়াই। ধরি রাখা দাই॥

ইজতিআ মাখি রাতি জেসন সভা পাই, দেখা বাহারাই, করমে মন ধরঅলি আঁকড়াই। দেখা বাহারাই॥

রুনুঝুনু গড়ে নেপুর খঁপাই ফুলা ডাইর, আপন চারিআই, সকতিপদঅ আহে জে ভেদাই। আপন চারিআই॥

মুচুক মুচুক ঝিঁগাফুল রিঝল ভাদরমাস এ হউ দেঅরা, করমে নইহরেক জাগেই আস। এ হউ দেঅরা॥ সাঁগি সাঁগে রিঝে রঁগে

ধানফুল ~ 10

নাচঅনে পিআস
এ হউ দেঅরা,
আঁচরাহিঁ উড়াইকে উসাস।
এ হউ দেঅরা।।
লেগেলাই আউঅতঅ দাদা
আহি জে বিসুআস
এ হউ দেঅরা,
করমে ভরমেক মাখি বাস।
এ হউ দেঅরা।।
পালঅব করম একাদসি
রহবঅ উপাস
এ হউ দেঅরা,
সকতিঁই কহেই জিবনেকর চাস।
এ হউ দেঅরা।।

বিঁগাফুলেক হলুক বুলুক গেঁদাফুলেক বন এ লউ বহিনি, জাউআফুলে জুড়াই জে জিবন।। পদদঅফুলেক মধুক হাঁসি - বেরা জতেক খন এ লউ বহিনি, কনে বুঝেই কাললাফুলেক মন।। সিমফুলাই দিলা ভুলাই ছিরিআই বরন এ লউ বহিনি, চাঁপাফুলা খঁপাকর সাজন।। কাস কাঁসি রুপে ভাঁসি কাপাসেক উড়অন এ লউ বহিনি, সকতিঁই কহেই মাঁই মাটিক ধন।।

মুচঅকে ইজতিআ রাতি হরঅখে ভিজইএ ছাতি অ-রে করমঅ নাচে, করম নাচে ডুবি গেলি মন॥

মাদঅরি ধমঅসা বাজে দেখা রে আখঅড়া মাঝেঁ অ-রে জাগি রে গেলা, জাগি গেলা নিদিআ জিবন।।

দিদিআ বহিনিআ সঁগঅতি গতনিআ অ-রে পাঁতা রে সারি, পাঁতাসারি নাচনঅ কুদন।।

আখঅড়াঁই করমঅ ডারি দিঅরা জেসঅনে চারি অ-রে জাউআ রে ডালি, জাউআ ডালি সকতিকেরি ধন।। ফিঁগফুটা ইজতিআ হরখলঅ মন, নাচিলে-খেলিলে সাধেকর করম।। (তরা)

বিঁগাফুলা ফুটঅলি হরইদঅ বরন, সাঁচিলে সাঁচিলে ধরম করম ॥(তরা)

ঢলঅ ধমঅসা মাদইর বাজন, সাজিলে সাজিলে চারি ভরম।। (তরা)

গিত রেগে তালে ভিজাই জিবন, বুঝিলে সুঝিলে সকতিক মরম (তরা)

খঁপা বাঁধি দে মাঁই গউ, কাজঅর পিঁধাই দে করমনাচে জাম হামে ,নেপুর পিঁধাই দে ॥ সাড়ি পিঁধাই দে মাঁই গউ, ঝুলা পিঁধাই দে আঁকঅস করিকে মাঁই গউ, কমর মেটি দে ॥ ডালি আনি দে মাঁই গউ দানা আনি দে জাউআ বুনবঅ হামে, নেতি সুঝাই দে ॥ গিত সিখাই দে মাঁই গউ,রিত বুঝাই দে সকর্তিই কহেই, ধরম করম ডহর দেখাই দে ॥

ঝিরিঝিরি ঝাননা বহি চলি জাই
কাঁহাঁ জনমতা ঝাননাক কাঁহাঁ জে মিলাই॥
ঝিরিঝিরি ঝাননা বহি চলি জাই
ডুঁগরিঁই জনমতা ভালা- সাগরেঁ মিলাই॥
গাছেক ফুটল ফুলা- মালা জে গাঁথাই
মাঁই কঁখোঁ জনম বেটিক- সঁইআঁক ঘার বসাই॥
ভাইএক লাগি বাপেক টিঢ়া- বহিনি বিদাই
সকতি রে এহে রিতি এরিআক পেরিআই॥

সিরিসিরি হাউআ মনউআ খেলাই
চালা হউ ভউজি পানি আনেলাই।।
ডাঁড়িআ ঝিঁটি ভউজি চঁগরাই চঁগরাই
পানিআ আনঅবঅ ঘেইলা ভরাই।।
রাঁধি বাঁটি জাবে ভউজি মকে ডাকেলাই,
ননদ ভাজ জাব হামরা ঘাঁস কাটেলাই।।
সিখাই দিহা গিত ভউজি করম নাচেলাই,
সকতি রে ভালঅ মঁদঅ করঅমেক হিললাই॥

পাহাড় নিঅর করম পরব আউঅলি লইজকাই, লেগে নেহি আউএই ভউজিক, আদরেকর ভাই।। চুরুক চুরুক ঠুটকু বাড়হিন- নাচেই আঁগনাই, চুলহাসারেঁ কাঁদেই ভউজি ধুঁগাক বাহানাই।। আঁক ছাড়ি পুই লতটা ভুঁইএঁ রে লতাই, মন নেহি ভরেই ভউজিক কাকরঅ কথাই।। ফুঁদেক চাঁদটি ভালি ভালি- মরেই ছটপটাই, ভিতরি মাইর সহগু জানেই, কহেই সকতিটাই।।

* * * *

ভাদরমাসে কাপাস রুআ উড়অলি রে-উড়অলি রে, (আর) করমেকর হুবে মন ভরঅলি রে।।

গাহব গিতা নাচব করম দিলা খলি রে-দিলা খলি রে, (আর) সাঁগিজড়ি পাঁতা সারি কলি কলি রে।।

মুচুক মুচুক হাঁসইএ মর জাউআ ডালি রে-জাউআ ডালি রে, (আর) সিরিসিরি বহেই হাউআ ভালি ভালি রে ॥

করম হাউআ গাতে গাতে লাগঅলি রে-লাগঅলি রে, (আর) সকতিপদক মনে রিঝ জাগঅলি রে।।

দাদীই হামর ছলি দেলেইক- আখড়া-রে করম নাচেলাই, মাঁইএঁ কিনি দেলি ডালা জাউআ বুনেলাই॥ আদর করি দুধুমাঁইএঁ সিখাই দেলি রে গিত গাহেলাই. দুধুবাপেক মুঁহেক মধু লারঁ ভুলেলাই।। বুনব জাউআ গাহব গিতা- নাচব করম রে দেহিআ ডলাই, আউআ লউ সঁগতি সভে ডেগে ডেগ মিলাই/রেগে রেগ মিলাই।। বছরদিনেক করম পরব, ভিজাই দিলা রে রিঝাই উঠেলাই, সকতিঁই কহেই জিবন ডহর করমেক হিললাই॥

ভাদরমাসেঁ করমপরব, উদকি উঠেই ছাতি-গউ মনেক সখে, করম নাচব রিঝে মাতি, গউ মনেক সখে॥ পুজবঅ করমঅ রাজা, জরি দিআ বাতি-গউ বনঅফুলেঁ, হালা হালা মালা গাঁথি, গউ বনঅফুলেঁ।। ফুলেঁ ফরেঁ সাজেই গাছা, ইজতিআই রাতি-গউ জাউআ ডালিঁই সাজেই করমঅ পরবতি, গউ জাউআ ডালিঁই॥

বছরদিনেক পরব দিদি- মনে রাখা গাঁথি-গউ কহেই সকতি, ভাখি চারিঁই ডুবাই মতি, গউ কহেই সকতি।।

মকে বিহা দেলে দাদা, নদি পারেক দেসেঁ করমঅ খেলে, দাদা, আনে জাবে কেসে, করমঅ খেলে॥ ডহরঅ টেকতউ নদিঁই, বইরিনি ভেসেঁ-গউ কেসে করি, দাদা, জাবে হামর দেসেঁ গউ কেসে করি॥ সসুরঘারেঁ বহিনিআ, কাঁদতউ তর আসেঁ গউ সেহঅ দুখা, দাদা,ভুলঅবে তঁই কেসে, গউ সেহঅ দুখা৷৷ ছললঅ আখঅড়া তর্ ভরি জাতউ ঘাঁসেঁ গউ সকতিঁই কহেই, বহিনিকর হাইনিকাসেঁ, গউ সকর্তিই কহেই॥

ঢলঅ মাদঅরি বাজেই, বাজেই রে নাগঅড়া গউ করম নাচে, মাতি গেলেইক জে আখঅড়া, গউ করম নাচে॥ আউআ লউ সঁগতি সভে, নাচঅব পাঁতাধরা, গউ রেগে ডেগে, হামরা উড়াই দেবেইক ধুরা, গউ রেগে ডেগে॥ মর করম ভাইএক ধরম, জিবনেকর গড়া গউ সঁচি দেখা, গঁথল সাঁচা নেগাচারা, গউ সঁচি দেখা॥ লকে লকে গহঅগহঅ- রিঝে দিলা ভরা গউ এসন দিনে, সকতি ভাগি অরাসরা, গউ এসন দিনে॥

* * * *

করমঅ আখঅড়াঁই দিদি, জরেইক দিআবাতি
লউ নাচি খেলি,
হামরা জাগব গটে রাতি,
লউ নাচি খেলি।।
ঢলঅ ধমঅসা বাজেই, উদকি উঠেই ছাতি
লউ সাঁগি জুড়ি,
সভে রিঝে মাতামাতি,
লউ সাঁগি জুড়ি।।

গাছ নাচেই, পাত নাচেই, নাচেই ফুলা জাতি
লউ আরঅ নাচেই,
হামরাক জনমভুঁই বসমতি,
লউ আরঅ নাচেই।।
জাউআ ডালাঁই করেই আলা,, আলা জে পরবতি
লউ এসন দিনে,
রিঝে সরঅসপঅ সকতি,
লউ এসন দিনে।।

করমঅ পরবে দাদা, লেগে নি আউঅলে রেভাদর গটে,
পিঠিআ বহিনি কাঁদাউলে রে,
ভাদর গটে।।
রহলাঁ নইহরেক আস, কাঁটা ঘড়ি দেলে রে
কিআ দসেঁ,
দাদা, বহিনি বিসরলে রে
কিআ দসোঁ।।
লরে বহি গেলি নদি, কথা জে সুনাউলে রে
সসুর ঘারেঁ,

মকে ছটঅ জে করঅলে, সসুরঘারোঁ।

কতেক খাইএতেলঁ দাদা, কতেক ধন বাঁচাউলে রে-পরব তিহার,

সকতি কাহে নিঠুর হেলে রে, পরব তিহার॥

* * * * *

* কনঅ বার্টে আউঅইএ করম গুসাঁই গউ কনঅ বাটেঁ, আউএই ভউজিকর ভাই গউ. কনঅ বার্টে ॥ * কুলহি বার্টে আউঅইএ করম গুসাঁই গউ বাড়িবাটেঁ, আউএই ভউজিকর ভাই গউ॥ * কিআ লাইএ আউঅইএ করম গুসাঁই গউ কিআ লাইএ, আউএই ভউজিকর ভাই গউ, কিআ লাইএ॥ * পরব লাইএ আউঅইএ করম গুসাঁই গউ বহিন লাইএ, আউএই ভউজিকর ভাই গউ, বহিন লাইএ।। সকতিপদঁই কহেই তবে, রিঝে মাতাই গউ রেগে ডেগে, বাঁচব মধুক নাতাই গউ রেগে ডেগে॥

মুঁহ চরা দেঅরা ভেঠর ভেঁসুর গউ সঁইআঁ হামর, বড়ি বেলাজ ডিগর গউ সঁইআঁ হামর॥ খরল মুড়হি সাসবুড়হি খাঁখড়ি সসুর গউ ননদ হামর, দিদি তিতকি নিঅর গউ ননদ হামর॥ জেঠানি হেঁইড়সারেক রানি লুসুরঅ পুসুর গউ কাপাড় হামর, জেসন ঘাটেকর পাখর গউ কাপাড় হামর॥ এসন ঘারেঁ বিহা মর কিনা জে কসুর গউ দেখি হামর সকতি গিরেই দুখেঁ লর গউ দেখি হামর॥

ফুলা লঢ়ে জাব চালা- ফুলেকা বন,
সুনা সিলিরা লউ॥
ডালা ভরি তড়বঅ- নানা জাতি ফুল,
সুনা সিলিরা লউ॥
ডাঁইর ধরি নাচবঅ- সাধেক করম,
সুনা সিলিরা লউ॥
নউআ ডালাঁই বুনবঅ- জাউআ সনাধন,
সুনা সিলিরা লউ॥

দিআ জরি পুজবঅ- করমঅ রাজন, সুনা সিলিরা লউ॥ হুবে ডুবি নাচবএ- সকতিকর মন সুনা সিলিরা লউ॥

ফুটি গেলা ঝিঁগা ফুল রিঝে দিলা বেআকুল দিদি লউ- করম পরব ঘারা দুআরাই ॥

আউআ সভে ধরাধরি নাচব খেলব পাঁতাসারি দিদি লউ, গাঁথি লিহা ফুলেকেরি হাইর॥

একাদসি করম রতি জরি দিআ জাগর বাতি দিদি লউ- পুজব করম গাড়ি করম ডাইর॥

রসিকাকর কান খাড়া মাদইরে তঅ দেলা সাড়া দিদি লউ- সকতিটা বড়ি রিঝুআইড়।।

ভাদরমাসে করম পরব রিঝে ভরল ছাতি গউ ডাঁইরধরি পাঁতাসারি- নাচত বহু বেটি গউ।।

করম ডাইর গাড়ি দেলা নাইআ মাহামতি গউ পুজতঅ করমঅ রাজা- সভে জে পরবতি গউ।।

গিতে রেগে গহঅ গহঅ- জরেইক দিআ বাতি গউ ধুরা উড়ি জাই দেখা, আখঅড়াকর মাটি গউ।।

করম পরব হামর গরব- মান ভরম খাঁটি গউ দাঁজি ভাঁজি সকতিপদঁই, কহেই খুঁটিনাটি গউ।।

* * * * *

তাঁগ ধিতাঁগ,তাঁগ ধিতাঁগ বাজইএ মাদঅরি লউ আউআ লউ সাঁগঅতি,করম,নাচব পাঁতা ধরি লউ।। খাঁপাই গাঁজি বন-ফুলা ফুলেকর হাইর করি লউ, ইঁধনে পিঁধনে সাজা করমঅ কুঁঅরি লউ।।

> গহঅ গহঅ আখঅড়া হুবেকর গহারি লউ, ফুলেঁ ফরেঁ ভভঅকাল হামরিকা চারি লউ।।

বছর দিনেক করম পরব- সভেকার পিঅরি লউ, সকতিপদঅ ছঁদঅরঁদঅ রিঝেক দিআ জরি লউ॥ পিআইজ বনাউ কুচি কুচি,অভাব জে রসুনে লউ,
ননদ হামর রাগাই আহি,বধাউবেঁই কেসঅনে লউ॥
ডুভা ভততি ভাত দেলেঁই,ডুভি ভততি সাগ লউ,
তাউ পিটরি তেলাইসুঁহিক,ধআই নিহি রাগ লউ॥
পুটুর পুটুর বাখান পাড়েই,ভিতর ঘারেঁ বসি লউ,
কআঁই ঠাঁঠেইক জনহাইর বাড়ি,মকে করেই দসি লউ॥
জাঁই নঅ বহিন সুনি আউএঁ,কিনা আহেইক মনে লউ,
মুরাদ হেলে পুরাব আসা,সকতিকর ধনে লউ॥

ভাদরমাসেঁ জনহাইর লেটঅ, দনাই দনাই খাব লউ

তাউ হামরা করমনাচে আখড়া মাতাব লউ।।

নাচব খেলব গিত গাহব,সাঁগিজড়িক ডাব লউ

আপন ভাখি চারিক রঁগেঁ মনকে গাবাব লউ।।
জিবন মানেই রিঝ রঁগ,ভাভেক সঁগেঁ ভাব লউ

মুঁ বাঁধিকে ফরকি রহাই,আহেইক কিনা লাভ লউ।।

বছরদিনেক করমপরব,ভুলি নিহি জাব লউ

সকতিঁই কহেই মিলিমেসি জিনগানি বিতাব লউ।।

মাছ ধরে গেলে দেঅরা আইলে সুধা হাঁথ হউ, কেথিক সঁগে এবেইর হামে বাঁটি দেবন ভাত হউ।। মাছেক আসেঁ রাঁধ নিহি দসরা তিঅন হউ, ভাত ঢরকাই বসি আঁহ বকঅলি জেইসন হউ।। সাস-সসুর আদি করি
আউতা খাইএক আসেঁ হউ,
বিন তিঅনে ভাত দেঅরা
মুহাঁই দেবেইন কেসে হউ॥
সকতিঁই কহেই মুনগাসাগ
আনিহা টনকাই হউ,
মাড় মেসাই রসুন দেইকে
দিহা জে ছনকাই হউ॥

* * * *

ভাদরমাসেক গারঅ চাঁদে- করমেকা দিনে ভাইএক হাঁথোঁ ধরমসুতা বাঁধেই জে বহিনে।। করমঅ পরবতি বহিন-সুথর ইজর মনে ভাইএক লাগি মাগেই আসিস, করমরাজাক ঠিনে।। ভাই বহিনেক মধুক নাতা অমঅরি বাঁধঅনে, পেরিআনি রহেক বাঁচি, রকতেকর টানে।। জরেই দিআ নাচেই হিআ, সকতিঁই ভাবেই মনে, সভে কিছু হেউএক দেখা, করমরাজাক গুনে।।

মাঁইএঁ বাপে বিহা দেলা ধনিঘার দেখি গউ (২) একডাঁটি মাড়েক লাগি মর রেকি রেকি॥

সাসেক হাঁথে কুলুপখাঢ়ি ননদ দেখাই সোঁখি গউ (২) সুঁহজারা সঁইআঁ হামর, অরাক পসল পাঁখি॥

তেল সাবন ইঁধন পিঁধন খজলে উঠত কঁখি গউ (২) জরিপড়ি দেহিআ মর, খেতে লাগল বঁখি॥

লরেঁঝরেঁ বিতেই দিনা দুখেঁ রাখল ছেঁকি গউ (২) সকতিঁই কহেই কাপাড়টাকে, কাঁহা দেবসিক ফেঁকি॥

> বিঁগাফুলা বিঁগাফুলা হরইদঅ বরন (২) তর লেখে কই হেলেইক, ননদিকর মন।।

অহরে পহরে সাঁতাই মারেই জিবন (২) মুঁহেঁ ফুটেই বাজড়া খই, খাপইরঅ জেসন॥

> তকে দেখি রে ফুলা বিসরই বেদন (২) ননদ দেখি রে ফুলা বরসই জলন॥

তর দিলা মধু মাখা সভে জে আপন (২) সকতিপদঁই কহেই কাথা, ননদিক কারন।।

ধাদকিফুল ধাদকিফুল ফুটেই লালে লাল গউ (২) উচিত কথাঁই বড়অ বহুক, লাগেইক বড়ি ঝাল॥

নিহি চিনহেই সসুর ভেঁসুর মুটা তাতল ফার গউ(২) খাইকুনে ধউএই নিহি, নিজেক সঁখড়ি থার ॥

গহাইল গবর বাঢ়াসঢ়াঁই ফুলাই রাখেই গাল গউ(২) কারিঝুরিক ডরেঁ ভউজি, ঢুকেই নি হেঁইড়সার॥

কথাঁই কথাঁই নইহর গরব খাইএক নিছু তাল গউ (২) সকতিপদঁই কহেই কথা, এসন বহু কাল।।

* * * * *

হামরাকর বড়অ ভউজি
কামচরনিক ঢাইড় গউ(২)
মুহেঁ তঅ খরঅমুহিঁই, দেতউ নিহি পাইড় ।।
কামেক লেইএ কুটুস কাটাস
হেলাহেইক জে নাইড় গউ(২)
দাদাক বলে মুখড় বহুঁই, পাউঅলাহেইক ছাইড় ॥
এতেক দিনউ চিনহেই নিহি
খেতি গঠ টাঁইড় গউ(২)
কবুহুঁ নি লেলেইক হাঁথে, সঁগসারেকর চাইড় ॥

দিনে দিনে মানে মানে দেহেইনা রগেক বাইড় গউ(২) সকতিঁই কহেই ভিনু খাইএক, গজালেইক আবাইড়॥

বাপে হামর কিনি দেলাক, ডালিআ রে জাউআ বুনেলাই,
দাদাঁই ছলি দেইল আখঅড়া করম নাচেলাই \।
দুধুমাঁইএঁ রেগে টুমে সুঝাঅলি রে
গিত গাহেলাই,
ডেগে চাইলে জাউআ করম ডাইর বেঢ়েলাই॥
মাঁইএঁ দেলি ধরমগুনে করমবাতি রে
জরাউএলাই,
নেগাচারেঁ সারেভারেঁ করম পুজেলাই॥
বছর বছর করমপরব ভাদরমাসেঁ রে
ধরম সঁচেলাই,
সকতিই কহেই মধুক নাতাই,মন গঁছেলাই॥

গহঅ গহঅ আখঅড়া বাজেইক মাদঅরি, নাচব খেলবঅ করম,পাঁতা ধরি ॥ জাউআ লেইএ আউআ করম কুঁঅরি, জাগব করমঅ রাতি, দিঅরা জরি ॥ সিরিসিরি হাউআ রেগেক লহঅরি,

ইজতিআ ভিজলরাতি, দিলা পিঅরি ॥ আপন ভাখি চারি জতঅনঅ করি, জগাই রাখবঅ সকতি,হিঅরা ভরি ॥

* * * *

কিআ লাইএ রে বঁখা ই ডাইর উ ডাইর রে,(২) কিআ লাইএ রে বঁখা পখঅরিকা ধাইর? খঁধা লাইএ রে বঁখা ই ডাইর উ ডাইর রে,(২) আহার লাইএ রে বঁখা পখঅরিকা ধাইর।। কিআ কিআ খাইএ বঁখা ঢঁড়হউআ ভরাই রে,(২) কিআ ডরেঁ রে বঁখা উড়িকুন পারাই ? বেঁগা মাছা খাইএ বঁখা চঁড়হউআ ভরাই রে,(২) সকতিঁই কহেই, ফাভদ দেখি উড়িকুন পারাই॥

কুঁড় কাটি চটাই মাটি ডাঁগাই বহাই সত, কুডমিকর হাঁথে গঢ়ল সনাকর ভারত।।

ধানফুল ~ 29

টঁড়হা ভরল চাসবাস থাহিআ বসত, দেখাউলাহাত সমাজ জিবন করমেক মহত।। মাঁই মাটিক ভালবাসা কুড়মিঁই জানত, দাঁজি ভাঁজি পরকিতিকে ডহরে চলত।। কুড়মি কবিলা মাহান জগতে জানত, কুড়মি মাঁইএক ছউআ সকতি ফুটিকে কহত।।

* * * * *

কাকঅরা ঘারেঁ ভালা
পঠিমাছেক ঝর,
কাকঅরা ঘারেঁ ভালা
ছেঁগ গর-গর-গর?
বড় দাদাক ঘারেঁ ভালা
পঠিমাছেক ঝর,
ছুটু দাদাক ঘারেঁ ভালা
ছেঁগ গর-গর-গর॥
কনে খাউঅইএ ভালা
ছেঁগ গর-গর-গর?
বড়অদাদাঁই খাউঅইএ ভালা

পঁঠিমাছেক বার,
ছুটুদাদাঁই খাউঅইএ ভালা
ছেঁগ গর-গর-গর ॥
বড়অ ঘারেঁ সুরুপ সুরুপ
সআদেক লহর,
সকতিঁই কহেই, ছটঅ ঘারেঁ
খসরঅ খসর ॥

কাঁহাহিঁ বাজইএ রুপাকর নেপুরউআ ইঅগউ- কাঁহা জে বাজেই, কাঁহা বাজেই দাদাকর মাদইর।। গড়েহিঁ বাজইএ রূপাকর নেপুরউআ ইঅগউ- আখঅড়াঁই রে বাজেই, আখঅড়াঁই বাজেই দাদাকর মাদইর।। কেসন কেসন বাজইএ, গড়েকর নেপুরউআ ইঅগউ- কেসন কেসন বাজেই, কেসন বাজেই দাদাকর মাদইর।। রুনুঝুনু বাজইএ গড়েকর নেপুরউআ ইঅগউ- ধিতাঁগ ধিতাঁগ বাজেই, ধিতাঁগ বাজেই দাদাকর মাদইর।। কনঅ ধনি নাচইএ মাঝঅ আখঅড়াঁই জে ইঅগউ- কনঅ রে ধনি, কনঅ ধনি রহলঅ হেঁইড়সার॥

হামে ধনি নাচততা মাঝতা আখঅড়াঁই জে ইঅগউ- ভউজি রে ধনি, সকতিঁই কহেই,রহলতা হেঁইড়সার॥

* * * * *

করম খেলব ভাদরমাসেঁ রহেঁহেলঁ নইহর আসেঁ ইঅগউ-পখইর ঘার্টেঁ, দাদাক মুহেঁ মাঁইএকর খভইর॥

বাটে না সঁসরইএ গড়
লরেঁ আঁখি ঝরঅঝর
ইঅগউ- মাঁইএকর সগেঁ,
ফুঁফুআই উঠঅলি দিলা মর।।

জেহঅ মাঁইএঁ জনম দেলি
ছতিক দুধাঁই মানসাঅলি
ইঅগউ- সেহঅ রে মাঁইএক,
বিদাই বেরি না দেখলেঁই মুঁ॥

মুললি মাঁইএক নইহর অড়
দুরুন দেসে বিহা মর
ইঅগউ- কহেই সকতি,
জাঁই মাঁইএক তেল খইরঅ নাহাই॥

কনে খজইএ ভালা- টসঅরেকা পাঁখউআ, ইঅগউ-কনে জে খজেই, কনে জে খজেই চাঁপাফুল।।

দেঅরাঁই খজইএ ভালা- টসঅরেকা পাঁখউআ, ইঅগউ- ননঅদেঁ খজঅইএ , ননঅদেঁ খজঅইএ চাঁপাফুল।।

কাঁহাঁ গাঁজতঅ ভালা- টসঅরেকা পাঁখউআ, ইঅগউ -কাঁহাঁ রে গাঁজতঅ, কাঁহাঁ রে গাঁজতঅ চাঁপাফুল।।

পঁখিআঁই গাঁজতঅ সকতি- টসঅরেকা পাঁখউআ, ইঅগউ- খাঁপাঁই রে গাঁজতঅ, খাঁপাঁই রে গাঁজতঅ চাঁপাফুল।।

ভউজিঃ ফুটঅলি ফুটঅলি কাস জাগঅলি নইহরেক আস করম খেলে জাম দেউরা, নইহর আপন ভাদরমাসেঁ।। দেউরাঃ বরিসাঁই ধরলঅ সান কাঁসাইএঁ পড়লঅ বান কইসে জাবেহে ভউজি, নইহর তহর ভাদরমাসেঁ? ভউজিঃ ভরল বানে ওঁগা ভাঁসাই হেলকিকে পার হেঅউম কাঁসাই দেউরাঃ ভাদঅরে বহিনেক আদর
লুটালুটি জনহাইর গাদর
সকতিপদঁই দেখেই ঘুরিফেরি আহা ভাদরমাসেঁ॥

হরইদ রাঁগঅল ধরম সুতা বাঁধবঅ রে দাদাক বাঁহিআঁই, করম পরব দিনা ধরল, ভাদর মহিনাই॥

দাদা হামর জিঅতঅ, দুধাভাতেঁ রে গুনেকর আলাই, এহে আসরা ভরল জে মর করঅমেক ডালাই।।

ভাই বহিনেক মধুক নাতা, সুথঅরা রে এহে বসমতাই, জুগোঁ জুগোঁ গাঁথাই আহেইক এরিআক পেরিআঁই ॥

ভাইএক সুখে বহিন সুখি, বহিন সুখে রে ভাই জে গনাই, সকতিঁই কহেই, জানি রহা জনাই জনাই॥

ভাদরমাসেঁ নইহর আসেঁ দিনা বিতি জাই, কবে আউঅবে মরঅ ভাইরে, মকে লেগেলাই।। ভালি ডহর- গনি পহর
দিলা ফুঁফুআই,
আঁখি লরেঁ বানঅ খেলি জাই রে, কাজরঅ ধআই ॥
করম পরব নইহর গরব
আহি জে গঁথাই,
সাসেঁ ননদেঁ এঁগিঠাই রে হাই, কথাঁই কথাঁই ॥

সাধেক বহিন- ইঠিন উঠিন কথাকর জালাঁই, সকর্তিই কহেই, করম খেলে ভাই রে, আহঁ জে লালহাঁই ॥

> জিবনঅ জিনগানিআ নদিআকর পানিআ নাচি লে বহিনিআ, বহি জাই জে দিনউআ।।

বরিসাঁই বানউআ সুখলঅ নিরনউআ রিঝে রঁগে ডুবাই রাখেঁ, দেহিআ মন ধনউআ ॥

ফুলে সভেই বনউআ হরখ রাঁগল মনউআ ধনঅ জইবন কহা, ধরি রাখেই কনউআ।।

ভাভি আর গনিআ ডলাউআ গউ বেনিআ সকতিপদক মনেক কথা, সুনে রে বহিনিআ॥

কেসন বহু আনলেসিক দাদা মর, ঘারেক কামে দেখাই নি মনঘন।।

কথাঁই কথাঁই দেখাই নিছু, মুহেঁক জর পড়াই ঝরাই রাঁধেই রে তিঅন।।

খাইএক খনে নুড়েই রে পসর পসর, নইহরেকর গরব রে হরখন।।

কইদিন বাদে নাচতউ জে মুড়েক উপর, সকতিই কহেই না করলে সাসন।।

* * * * *

কাকর কাঁধে সাজেই ভালা মাদঅরি, কাকর গড়েঁ সাজেই রে নেপুর ?

দাদাক কাঁধে সাজেই ভালা মাদঅরি, হামর গড়েঁ সাজেই রে নেপুর।। কেইসন কেইসন বাজেই ভালা মাদঅরি, কেইসন কেইসন বাজেই রে নেপুর ?

ধাতুন তুনা বাজেই ভালা মাদঅরি, রুনুঝুনু বাজেই রে নেপুর।।

নাচে গিতে আখঅড়া তঅ মাতি গেইল, সকতিঁই কহেই, ভেঁসুরা ধুর ধুর ॥

গেরহত বিরহিবাড়ি নউতন বেহাই লউ। বাড়িহেঁটে বিরহি লতে গিরলা বাঝাই লউ।।

কাদা মাটিই থেরেথেপে পিঁধনা গাবাই লউ। বাঘলাজা বেহাই ঢুকি দেলা জে ডভাই লউ॥

মেচাইল পাঁঠিমাছ বহিন, বিলাতি মেসাই লউ। রাঁধিবাঁটি বসি আঁহ, বেহাইএক আসাঁই লউ।।

দেখিসুনি বানার দেলা সকতি খুড়াঁই লউ। একটা খুঁট পিঁধি বেহাই, একটা উড়াই লউ।।

* * * * *

সঁইআঁ গেলা হার জতে পখঅরি আগাড় লউ। ছটঅ দেঅর বাঁধি কমর, লেসইএ পাঘাড় লউ।।

থেরেথেপে কামেক মাঝেঁ বেসিআমেক চাঁড় লউ। ভিজল কাঠেক সেঁগসেঁগি, কখন ডবকেক মাড় লউ।।

আহি একটি টুরকি ননদ- পিসনাহিক ঝাড় লউ।
ফুটল ফুলাউ তড়েই নিহি, জালাই মারেই হাড় লউ।।
বেসিআমেক ডেরি হেলে বাখানেক পাহাড় লউ।
সকতিঁই কহেই, কাকর মুঁটা, দেবসিক তঁই আড় লউ।

সাস বাদি সসুর বাদি, সঁইআঁ হেলা পর লউ।
মাঁইএঁ বাপে বিহা দেলা সইতিনি উপর লউ।
দসেঁ বিনা দসেঁ লিআই, অহর পহর লউ।
ঘারেক কথা ঘারেই রাখাঁ, করাঁ নিহি সর লউ।
মাছ মাস তিঅন হেলে অরাকর বতর লউ।
হামর লাইএ মুঁ-মচকা কুলাই নিহি ঝর লউ।।
ছতি ভরল দুখ হামর, আঁখি ভরল লর লউ।
সকতিঁই কহেই, কেসে জানঅম কন করঅমেক ফর লউ।

করম পরব ছেঁকাছেঁকি,উদকাই পুদকাই লউ রিঝকাই আউঅলঅ হামরাক ভউজিকর ভাই লউ॥ নইহর টানে ভউজিক মন,গেলেইক উজাই লউ কিনা করম কিনা নিহি,গিরেই অজবঝাই লউ॥ সটর বটর সাজে লাগেই,নচাঁই খঁচাঁই লউ গড়েকর নেপুরা ভালা,পিঁধেইক ঘেঁচাঁই লউ॥ চইখেক কাজর অঁঠে লেসেই,বিছিআ সিঁথাঁই লউ বাঁহিক বাজুবাঁই আরঅ গড়েঁ জে গতাই লউ॥ বাঁটল মাঁড় কুঁড়িঁই ঢারি,মাগেইন বিদাই লউ, ই ঘার উ ঘার ঢুকিঢাকি আঁগনা রিঠাই লউ॥ থারি বিখরেতে ভউজিক,হাঁথ লে ফেঁকাই লউ, দেখিসুনি সকতিকর,হাঁসি নি টেকাই লউ॥

লে বেটি খাতা পাঁথি জাঁই বেটি পড়হেঁ গউ
লেখাপড়হা সিখেঁ বেটি জিনগানি গড়হেঁ গউ॥
লেখাপড়হা জিএক গড়া খেআল রাখিস মুড়েঁ গউ
গাছেকর জিনগানি বেটি মাটি জেসন ফেড়েঁ গউ॥
সিকখা ছাড়া আঁধার জিবন সিকল বাঁধল গড়েঁ গউ
চইখঅ রহেইতে বেটি বাটঅ টমঅড়ে গউ॥
মুকখু জিবন ঠঁকাই মরঅত ঠেসঅ বজঅড়েঁ গউ
সকতিপদঁই গাহেই গিত গিআনেকর অড়েঁ গউ॥

কনঅ বনেক কাঠ বেটি, কনঅ বনেক লতা গউ কনঅ ফুলাহিঁ বেটি বাঁধঅলে খাঁপাঁ গউ।। বড়অ বনেক কাঠ মাঁই গউ,ছটঅ বনেক লতা গউ চাঁপা জে ফুলেঁ মাঁই গউ,বাঁধঅলঁ খাঁপাঁ গউ।। কেইসন কেইসন কাঠ বেটি,কেইসনঅ লতা গউ কেইসন কেইসন ফুলা বেটি, বাঁধঅলে খাঁপাঁ গউ।।

সুখল সুখল কাঠ মাঁই গউ, চিমড়অলঅ লতা গউ
মহঅমহঅ ফুলা মাঁই গউ, বাঁধঅলঁ খাঁপাঁ গউ॥
কেথিক লাগি কাঠ বেটি,কেথিক লাগি লতা গউ
কেথিক লাগি ফুলা বেটি বাঁধঅলে খাঁপাঁ গউ॥

রাঁধেক লাগি কাঠ মাঁই গউ, বাঁধেক লাগি লতা গউ সাজন লাগি ফুলা মাঁই গউ, বাঁধঅলঁ খাঁপাঁ গউ॥

ইঁচলিমাছেক চড়চড়ি পঁঠিমাছেক ব্যর হউ ছটে দেঅর, সআদ লুলুহা উপর হউ ছটে দেঅর।।

চাখিচুখি ছটে ননদ বাহার-ভিতর হউ ছটে দেঅর, জহেই লুপচেক বতর হউ ছটে দেঅর।।

ইঁচলি সুঁঘা পঁঠি তিতা নামে কাহে ডর হউ ছটে দেঅর, রাঁধেক হাঁথটা হামর হউ ছটে দেঅর।। সকতিপদঁই কাকর মুহেঁ
সুনি এ খভর হউ
ছটে দেঅর,
লভে লহর চহর হউ
ছটে দেঅর ।।

* * * *

আউলঅ ভাদরঅ মাস ফুটলঅ কাস গউ মনে হামর, জাগল নইহরেক আস গউ মনে হামর॥ লুরুক লুরুক আউঅতঅ করম পরব গউ হিআ মাঝেঁ, নাচেই নইহর গরব গউ হিআ মাঝেঁ॥ সঁগি সঁগেঁ রিঝে রঁগেঁ করম খেলব গউ ডারি তরেঁ, সুখেক দিআ জরব গউ, ডারি তরেঁ॥ আপন ভাখি চারি ধন জগাই রাখব গউ পরেক কথাঁই, সকতি কাহে বিসরব গউ, পরেক কথাঁই॥

হবঅকি ডবঅকি কাঁসাই বানে খেলি জাই ভইআ রহলঅ টেকাই নইহর-জাম কেসে গউ-হামে করম খেলেলাই।।

লহরে লহরে পানি অকাল বরিসাই দেখি দিলা ফুঁফুআই, ভাভঁ কিনা করম গউ- করম আউঅলি লইজকাই॥

দিনা গনি ভালি ভালি- আঁখিআ ঝুরুআই বান কবে জে জিজাই, রিঝল ভিজল পরান গউ- হামর দুখেঁ লরুআই।।

পেটে ভুখা মুঁহ সুখা আহার নি রুচাই দেখি কহেই সকতিআই, ডঁগাই বান পাইরাই হউ-ভউজি আউঅতঅ তর ভাই।।

জাগা হউ কুড়মি তরা,না রহা নিদাই
জাগি উঠা সভেকাই
আপন ভাখি-চারি হউ-ধরম ভরম বাঁচাইলাই।।
কাঁদহন জে সমাজমাঁই, ফুঁফুআই ফুঁফুআই
লরে ছাতি বহি জাই,
কাহে ডুবি আইহা হউ - তরা খেআলঅ হেজাই।।

পরব তিহার নেগাচার,রাখিহা জগাই দেখি এরিআক পেরিআই, করম বীদনা টুসু হউ-জিবন ডহর জে দেখাই।। সমাজ নামে সমাজ কামে-আউআ আগুআই কেন্থ না রহা পেছুআই, কহেই সকতিপদঁই গউ-বীচা মুঁড়উআ উঠাই।।

দাদা হামর রহে হেলাক- আউএহেলাক পরব-তিহারেঁ। আইজ হামর নাই রে দাদা-লরেঁঝরেঁ ভাঁসঁ সসুরঘারেঁ।।

করম বাঁদনা টুসু পরব-ঘুরি আউএই বছরেঁ বছরেঁ। সাধেকর নইহর হামর, হেরাই গেলি দুখেকর আঁধারেঁ।।

মাঁই বাপেক বিছড় বেদন-ভুলঅরহঁ দাদাকর আদরেঁ। সেহঅ দাদাঁই-হিআ কাঁদাই,ভাঁসাই দেলাক দুখেক সমুনদরেঁ।।

পরব তিহার কাঁদেই দিলা- অউ গউ দিদি, দাদাক বিছড় ভারেঁ। মর নিঅর জনমদুখনি,দসরঅ আর নেখে জে সঁগসারেঁ।।

* * * * *

খঁপা বাঁধি দে নঅ গউ মাঁই, দে মাঁই গউ কাজঅরা পিঁধাই। করম পরব হেলেইক বাসি-এবেইর বেটি হেতউ জে বিদাই।।

করমরাজা চলি গেলাক-গেলাক চলি কাঁসাই নদিক পার। করম ডারি ভাঁসি গেলি-বেটিআ তর জাতউ সসুরঘার।।

সাসেক দেঅল সারেভারেঁ-জরাউলঁ মাঁই করমঅ বাতিআ। তরি দেঅল সারেভারেঁ-অউ গউ অ মাঁই, পুজবঅ জিতিআ।।

আসিস চুমাঁই বিদাই গউ মাঁই-অউ গউ অ মাঁই
করম ধরম সঁচি।
সকতিপদঁই কহেই কথা, অউ গউ অ মাঁই মনেক আঁধা পঁছি।।

দেঅর-ভউজি

রিমিঝিমি পানিআ লহরে লহর কেইসে চলবঅ ডহর টসরেকা সাড়ি মর-কাদাকেরি ডর কেইসে চলবঅ ডহর ?

ছাতা ধরবঅ হামে তহরি দেঅর ভউজি মনে কাহে ডর, পগড়ি বিছাইএ দেবঁ বাটেকর উপর ভউজি মনে কাহে ডর।। সিরিসিরি কালহা হাউআ কাঁপেই দেহি মর দেঅরা পালহাকে নিঅর জাড়া ভেদি গেলে গাতে-বেজারেকা ভর, কেইসে চলবঅ ডহর ?

অড়হাইএ জে দেবঁ ভউজি, দহরি চাদর সুনে বাতউআ হামর, কাঁধেকর গমঅছি আড়েঁ-চলঅবে ডহর সুনে বাতউআ হামর।।

মেঘঅ আঁধারি দেঅরা ,চলেই নি নজর কেইসে চলঅবঅ ডহর, পিছলি গিরঅলে ভাঁগি জাতি জে হাড়গড়, কেইসে চলঅবঅ ডহর ?

ভরিসা রাখেঁ হউ ভউজি-হামঅরি উপর দিলা করিকে সুথর, হাঁথেঁ ধরি লেলে জাবঁ, ঠানন সকতিকর, দিলা করিকে সুথর।।

ভাদরঅ মাসে ভালা জাগলঅ কাসবন রে করমেকা রিঝে, ভিজঅলি হামর মন রে।। সরাবনে ভরল বানে-কাঁসাই জেইসন রে উদকলি হিআ, নি মানইএ বাঁধন রে।। সাঁগি সাঁগে রিঝে রাঁগে নাচনঅ কুদন রে ভাদরে আদরেঁ-করঅমেকা জিবন রে।। পুজবঅ করমরাজা-দেইএ মনঅ ধন রে সকতিকর কথা, এ চারিআ আপন রে॥

সিথিআঁই সিঁদুরা নাই কুঁঅরি উমইরে মাঁই বেটা দেখি জুড়াই জে জিবন। বেটি কনে দেলউ, তকে করাই বেটা ধন। বেটি কনে দেলউ॥ তেলঅ হরঅদি মাখাই সিঁদুরা কাজঅরা পিঁধাই সাধেক বেটাক লালন-পালন। বেটি কনে দেলউ....।। একি কাঁখে জাউআ ডালি দসর কাঁখে বেটা করি করমরাজা করঅলে পুজন। বেটি কনে দেলউ ।।। করাক বেটা দান করি চিলহঅ সিআরি সেঁউরি সকর্তিই কহেই, পাননা বাসি অন। বেটি কনে দেলউ.....।।

ফুড়কি ছাতিক তিঅন রাঁধি

সুঁহ হেলেইক বাঁধাবাঁধি

কম দেখি আপনঅ ভাগোঁ।

দিদি ছটে ননদ,
মুঁ-টা ফুলাই লেলেইক রাগেঁ।
দিদি ছটে ননদ।।
দাতে দাত কুটি কুটি
খাইএক ছাড়ি গেলি উঠি
ঘারলে বাহারালি একে ডেগে।
দিদি ছটে ননদ.....।

মাঁই বেটিক ফাসার ফুসুর হামর মুঁড়ে জতি কসুর হেঁইড়কা ভাঁগঅলা হুড়কা ডাঁগোঁ। দিদি ছটে ননদ.....।

রাতিই নিহি রাঁধাবাঁটাভুখেঁ সুতল নিঠাকাঠা
কাহে সকতি গেলে তিঅন মাগে।
দিদি ছটে ননদ.....।

নইহরেঁ বাপেক অধিন সসুরঘারেঁ সঁইআঁক বাঁধিন বনঅ মাঝেঁ কাঁদেই বনঅলতা। গউ কনে বুঝেই, হাইরে,বেটিছউআক বেখা। গউ কনে বুঝেই॥ আপন জনম টিড়হা ছাড়ি পরেক টিড়হাঁই সিঁকড় গাড়ি
জড়ে হেউএইন সঁগসারেক নাতা।
গউ কনে বুঝেই·····।
জাখরা হেউএ লারঅত মাঁই
দিসা উসা জাইন গুমাঁই
জিবঅনেকর সাধ সউআদ বিথা।
গউ কনে বুঝেই····।

নিহি পাউলে লহা সিঁদুর
চাইরঅ বাটে দেখঅত ধুঁধুর
সুনে হেউএইক কতেক মঁদঅ কথা।
গউ কনে বুঝেই····।

সঁগসারেক ঘানি টানি বিতেইন গটে জিনগানি সকতিঁই কহেই,দিআকর পলিতা। গউ কনে বুঝেই····।

ভাদর মাসেঁ করম পরব রিঝেঁ ভিজঅল ছতিআ, এ লউ সঁগঅতিআ, নাচঅব খেলঅব করম রাতিআ॥ ডালাই ডালাই সনাক জাউআ জরেইক জাগর বাতিআ, এ লউ সঁগঅতিআ, ডাইর তরেঁ পরঅবতিআ॥

করঅমে ভরঅমঅ মতি
পোনিঅসি সতিআ,
এ লউ সঁগঅতিআ,
ডাঁইড় ধরা গাহা গিতিআ।।

করম পরব হামর গরব সকতিঁই কুটেই থথিআ, এ লউ সঁগঅতিআ, জিআই রাখব আপন রিতিআ॥

ধানফুলা কাসফুলাঁই সাজঅলঅ ভাদর রে,
বহঅলি করমঅ হাউআ, রিঝঅলি অনতর রে।।
জাগঅলঅ ঢলঅ ধমঅসা বাঁসিআ মাদইর রে,
ইজঅরা আকাস হাঁসেই, কাটিকে বাদইর রে।।
মুচকইএ ঝিঁগাফুলা জনহাইরেক আদর রে,
করম রেগেক হেলকঅনিই, মনউআ বিভর রে॥
সুরসুরাই গড়হাঁথ অহরঅ পহর রে,
সকতিঁই কহেই ভালেই বহুঁই,নইহরেক ডহর রে॥

করঅমঅ ভাদরঅ মাস
সাঁসিরেঁ সাজঅলঅ ঘাঁস
ইজতিআঁই হাঁসেই বনঅফুল গউ।
রসিকা মন রিঝেঁ বেআকুল।।
মাদঅরিক হাঁকানি সুনি
কনে রহেই লেইএ ঠুনি
হেরাই জাই আলিস বেজার ঢুল গউ।
জরিকে করমঅ বাতি
নাচব খেলব গটে রাতি
হরখ নদি উছুলঅ ডুবুল গউ।
নাচে গিতে বহাই বান
জিআই রাখব আপন মান
সকতিঁই কহেই, জিবনেকর মূল গউ।

লহঅ লহঅ ভাদঅরেঁ
করঅমেকর আদঅরেঁ
খেলেই হাউআ সিরিসিরি,
রিকোঁ দিলা জাগঅলি হামঅরি।
নাচব করম পাঁতাধরি।।
নাউআ নাউআ ডালিআ
নদিআকর বালিআ
অঁজঅরেঁ অঁজঅরেঁ ভরি,
সাধেক জাউআ বুনব জতন করি।
সাজঅম গউ কুঁঅরি মাঁই

পুজম করম দিআ জরি, মাঝ আখঅড়াঁই গাড়াই করম ডারি। করম রাঁগল মতিআ রিঝোঁ ভিজল ছতিআ কেসে ভুলম আপন চারি, সকতিপদঁই কহেই ঘুরিফেরি।

গহঅগহঅ আখঅড়া বাজইএ ঢউল নাগঅড়া কাঁহাঁ গেলা, হামর ভাদইরা মাদইরা। কাঁহাঁ গেলা॥ নি বাজঅলে মাদঅরি মানাই নেহি ঝুমঅরি ডাকি আনা, কাঁহাঁ ভুলি রহল আদইরা। ডাকি আনা॥ নুন বিনু তিঅনা (আর) মাদইর বিনু নাচঅনা লাজেঁ বিঁধেই, মকে হেঅইতে গউ সদইরা। লাজেঁ বিঁধেই॥ এসন সখেক রাতিআ হুবেঁ ভরল ছতিআ রসিক বিনু, সকতি লাগেইক জে গউ আধইড়া।

রসিক বিনু॥

মড়কচাঁই পানি ঝঁকরেই ,মাইঝা ঘারেঁ কাদা রে
বহুক গুনে,
ভেড়া হেলাক হামর দাদা রে,
বহুক গুনে॥
বহুক কথাঁই উঠন বইঠন, জেসন ধবিক গাধা রে
বহুক নেজেঁ,
গুনেক দাদাক গড়হাঁথ বাঁধা রে
বহুক নেজেঁ॥
বহুই জদি রসুন ছেঁছেইক, দাদাঁই ছেঁছেইক আদা রে
বহুই হেলেইক এখন ধন মানেক গাদা রে
বহুই হেলেইক।।
বিহাক আগু রহেহেলাক,কতেক সিধাসাধা রে
দেখিসুনি,
সকতিক মনে লাগেই ধাঁধা রে
দেখিসুনি॥



नान- ज्यस्य मार्गण्या परि- विवानिति मार्गण्या नेषि- विविधि, ज्यस्य न्यस्य - ७१८७५८ १०८५ भूतस्या (भरवर), स्वास्य न्यस्य - ७१८७५८ १०८५ विज्ञाल नेषि- जिल्लास, तिसिसियि, त्नेष्टस्रिति कानंत्रन गिष्ट, दांका निषा चेनीर त्नेमास्य, मार्थस्य संद्ये द्यक्ति जिल्ला,

ছাপাই মুহাল- দিআ, ছটজরাক সুদানি সঁগিআ সঁজুআনিই নিখরাল পথি- ধ্র্মজরা, জহার করম, লতে লতে বিহাগিত, লতে লতে করম গিত, পুরখেনি সঁহরই গিত, কুড়মালি চারি, মাহারাই গিড

